

# **KEMAYUHKA AGI CHALUN INDU ARI BANSA DAYAK BA PRN11**

**20 March 2016**

**- The Borneo Post Online**

Dikarang Rengenyang Labang

KUCHING: Barisan Nasional (BN) patut bisi perambu milih raban orang indu ari bansa Dayak kelebih agi Iban enggau Bidayuh nyadi Kaban Kunsil Nengeri (ADUN) ba atur Pengawa Bepilih Nengeri (PRN) tu ila.

Penganalisis Politik ti mega Pengelicha Politik ba Opis Sosiobudaya Universiti Malaya, Dr. Awang Azman Awang Pawi madah, Kepala Menteri Datuk Patinggi Tan Sri Adenan Satem patut ulih beratika sereta ngemeratka pekara tu sereta meri peluang ngagai raban indu bansa Iban enggau Bidayuh ngambika ulih ngetanka hak indu bansa nya.

Niang Datuk Seri Tra Zehnder, indu Iban keterubah ti kala megai sitak dalam Kunsil Nengeri Sarawak (1960-1963).

“Udah datai ba maya ke patut Kepala Menteri meda sereta beratika sereta ngemeratka pekara tu.

“Lebuh Sarawak betapi enggau gelombang globalisasyen enggau datai ba abad ke-21, bedau bisi indu Iban enggau Bidayuh dipilih nyadi ADUN tauka Kaban Parlimen (MP). Datuk Seri Tra Zehnder dichirika British.

“Enti baka nya, runding politik 60-an majak mansang ke mua agi laban Datuk Seri Tra Zehnder nyadi indu Iban kererubah ba DUN sarawak ti dikelala enggau nama Kaunsil Nengeri ba taun 1960 nyeentuk 1963,” ku iya madah ngagai Utusan Borneo.

Taja pia, Azman ti asal ari Sarawak madahka diri enda ngenggaika raban indu Dayak kelebih agi Iban ti bisi pilih nyadi Senator iya nya semina renggat ‘dichiri’ aja.

Ke bisi semina renggat ‘dichiri’ iya nya baka Dato Sri empiang Jabu ti dichirika nyadi Senator tauka Kaban Dewan Negara, lalu iya mega Ketua Raban Indu Parti Pesaka Bumiputera Bersatu (PBB), ku iya.

Kelimpah ari nya ku iya, Ketua Raban Indu Parti Rakyat Sarawak (PRS) mega dichiri nyadi Senator ba taun 2010, iya nya Senator Datuk Doris Sophia. Nambahka Doris indu Sarawak keterubah dichirika nyadi Sapit Yang Dipertua Dewan Negara.

“Tang pengawa nyiri senator ukai dipilih rayat nengah peti undi,” ku iya.

Ngenang pekara nya baru, Awang Azman bepenemu Kepala Menteri ulih ngasuh ngambi chalun indu BN Sarawak patut bisi indu Iban enggau Bidayuh.

“Tang manah agi nyema pemesai Iban enggau Bidayuh empu ngaga pemutus lalu milih sekeda chalun indu nyadi chalun BN Sarawak,” ku iya.